

# МИЛЛИЙ АХБОРОТ-КУТУБХОНА ҲАФТАЛИГИ ЯКУНЛАНДИ

► ҚАРОР ВА ИЖРО



Ўзбекистон Республикаси Президентининг 2017 йил 13 сентябрдаги «Китоб маҳсулотларини нашр этиш ва тарқатиш тизимини ривожлантириш, китоб мутолааси ва китобхонлик маданиятини ошириш ҳамда тарғиб қилиш бўйича комплекс чора-тадбирлар дастури тўғрисида»ги қарорида Ўзбекистон матбуот ва ахборот агентлиги ахборот-кутубхона фаолияти соҳасидаги махсус ваколатли давлат органи этиб белгиланиб, агентлик томонидан ушбу йўналишда қатор ишларни амалга оширилмоқда. Айниқса, китоб тарғиботини, китобхонлик маданиятини юксалтиришга, ахборот-кутубхона фаолиятини янги босқич олиб чиқишга қаратилган чора-тадбирлар эътиборга моликдир.

Алишер Навоий номидаги Ўзбекистон Миллий кутубхонаси китобхонларнинг қизиқиш, талаб ва эҳтиёжларини ҳисобга олиб, кутубхона ресурслари билан тўлдириш билан бирга, турли мавзудаги маънавий-маърифий тадбирларни мунтазам ўтказиб келмоқда.

Ана шундай тадбирлардан бири — бир неча йилдан бери ташкил этиб келинаётган Миллий ахборот-кутубхона ҳафталигидир.

2-бет



# МИЛЛИЙ АХБОРОТ- КУТУБХОНА ҲАФТАЛИГИ ЯКУНЛАНДИ

Бошланиши  
1-бетда

Ҳафталикнинг қамрови кенглиги учун ҳам уни нафақат ахборот-кутубхона муассасалари мутахассислари балки кенг китобхонлар ҳам орзиқиб кутадилар. Чунки ҳафталик доирасидаги тадбирларнинг хилма-хиллиги, йилдан-йилга қизиқарли ва мазмундор бўлиб бораётгани учун у кўпчилиكنинг эътиборини жалб қилмоқда.

Шу ўринда ушбу ҳафталикнинг тарихига қисқача тўхталадиган бўлсак, дастлаб “Китобхонлик куни” номи билан 2003 йилдан ўтказила бошланган. Ушбу тадбир 2005-2009 йиллар оралиғида “Мутолаа байрами” мавзуидаги тадбирлар туркумида давом эттирилди. 2012 йилдан эса Миллий ахборот-кутубхона ҳафталиги номи билан ўтказилмоқда.

Юқоридагилардан қатъи назар, тадбирнинг мақсади ахборот-кутубхона муассасаларига фойдаланувчиларни кенгроқ жалб этиш, уларнинг илм олишлари учун зарур шарт-шароит яратиш, илғор тажрибаларни оммалаштириш, ахборот-кутубхона муассасалари мутахассисларининг малака оширишлари, тажриба алмашишлари учун имконият яратишдан иборатдир.

Бу сафарги Миллий ахборот-кутубхона ҳафталиги жорий йилнинг 30 октябридан 3 ноябригача бўлиб ўтди. Ҳафталикда Ўзбекистон Республикаси Президентининг 2017 йил 28 июлдаги “Маънавий-маърифий ишлар самарадорлигини ошириш ва соҳани ривожлантиришни янги босқичга кўтариш тўғрисида”ги, 2017 йил 13 сентябрдаги “Китоб маҳсулотларини нашр этиш ва тарқатиш тизимини ривожлантириш, китоб мутолааси ва китобхонлик маданиятини ошириш ҳамда тарғиб қилиш бўйича комплекс чора-тадбирлар дастури тўғрисида”ги қарорларида белгиланган вазифаларнинг ижросига алоҳида эътибор қаратилди.

Ҳафталик доирасида ўтказилган 50 дан ортиқ тадбирда иштирок этган ҳар бир китобхон, ахборот-кутубхона муассасалари ҳар бир мутахассисининг эътибордан четда қолмади.

Мазкур ҳафталикнинг аввалгиларидан фарқи – моҳияти тубдан янгича бўлган тадбирларнинг ўтказилишидадир. Хусусан, таниқли кутубхонашунос, библиограф, тарихчи, китобшунос ва педагог Евгений Бетгер шарафига ўтказилган давра суҳбати “Халқаро кутубхона ҳамкорлиги: янги имкониятлар ва ривожланиш истиқболлари” мавзусига бағишланди. Унда Ўзбекистондаги АҚШ элчихонаси маълумотлар хизмати маслаҳатчиси С.Андерсон “Ўзбекистон Миллий кутубхонаси ва Ўзбекистондаги АҚШ элчихонаси ўртасидаги ҳамкорлик истиқболлари”, Назарбоев номидаги университет кутубхонаси менежер-эксперти, фан доктори Р.Алензуэла “Кутубхона ассоциациялари халқаро федерациясининг глобал лойиҳалар ва дастурлар шарҳи (ИФЛА)” мавзусида маърузалар ўқишди. Шунингдек, давра суҳбатида Кемерово давлат маданият институти билан видеомулоқот ўрнатилиб, онлайн мулоқот-вебинар ташкил этилди.

Бу йилги ҳафталикда Давлат стандартлари асосида электрон каталогни самарали ташкиллаштириш, ахборот-кутубхона ресурсларини каталоглаштириш, предметлаштириш ва туркумлаштириш бўйича малака оширишга мўлжалланган “Каталогизатор мактаби”, “Қўлёзмалар ва нодир нашрлар – маърифат ва маданият хазинасига қалит” мавзуидаги семинар-тренинг, “Виртуал ва инновацион хизмат кўрсатиш ҳамда АҚШдаги оммавий кутубхоналарда замонавий технологияларнинг қўлланилиши” мавзуидаги семинар ахборот-кутубхона муассасаларининг мутахассислари учун амалий тажриба алмашиш мактаби бўлди.

Ҳафталик доирасида “Китоб ва мутолаа менинг ҳаётимда” мавзуида Ўзбекистон Фанлар академияси академиклари, Ўзбекистон Республикаси фан арбоблари — Бахтиёр Назаров, Сойибжон Негматов, “Фидокорона хизматлари учун” ордени совриндорлари — Саъдулла Искандаров, Маҳмуд Салоҳиддинов, Ромэн Зоҳидов, Россия ФАнинг И.П.Павлов номидаги мукофот совриндори Бакир Зарипов билан учрашув, “Китоб – билим ва маънавият манбаи” мавзуида шоира Умида Абдуазимова билан ижодий учрашувларда китоб ва китобхонликнинг ўрни ҳақида фикр юритилди.

Бундан ташқари, “Ахборот-кутубхона муассасасининг энг яхши мутахассиси”, “Ислом Каримов асарлари билимдони” кўрик-танловлари ва “Китоб орқали оламни кашф этаман” мавзуида мактаб ўқувчилари билан дидактик-интерфаол ўйинлар ҳафталикнинг янада кўтаринки руҳда ўтишига сабаб бўлди.

Ҳафталик иштирокчиларида бахши Абдуназар Поёнов билан учрашув, “Кутубхонада шеърят ва мусиқа кечаси” рукнидан Шароф Рашидов ва Комилжон Отаниёзовнинг 100 йиллиги ҳамда Эркин Воҳидовнинг 80 йиллигига бағишланган назм, наср ва наво кечаси кўпчилиқда катта таассурот қолдирди.

**Ободбой ҚИЛИЧБОЕВ,**

**Алишер Навоий номидаги Ўзбекистон Миллий кутубхонаси илмий методика ва тадқиқот хизматининг бош мутахассиси**